

MEJE PO CARTE PABLO TATINA, EFESO TOMARAPIWI TATINATSI

Meje yabara poxonae Pablo tamropata pitaba xua
tatina pomonaetha pomonaefeso tomarapiwi

1 ¹Xan, Pablon, pacata tinatsi. Nacom necana exana xua Cristo Jesús pia peitorobi jiwi jiwana tatsin xua bapon peichichipaexae. Pacata tinatsi pomonaepam pomonaefeso tomaratha. Paxam beta xanepanaya pajume cowunteibame Cristo Jesús xua Nacom caemonaepainya nepaca exanaexae Cristo Jesustha. ²Barabux Nacom, pon Waxa irux Jesucristo, pon jiwi Pecanamataxeinaein, baponbe paca yawenaena pia paca necaantobexae. Matautano barabux baponbe peburuxya juntema jinompa paca cana exanaena.

Meje yabara xua poxonaefeso Nacom wanaca yawenaewa, wanaca antobexae

³Barabux waxainchi tsipaebatsi Nacomtha, Jesucristo Wanacanamataxeinaein, pia Nacom tatsi xuano xua Paxa tatsi. Jeichichi: “Nacom maisa pajuntux coyene weiweinanjinya pata taneyawenaewaxaem”, jeichichi. Daxita waxainchi Nacom caemonaewanaca cana exanaexae Cristotha, daxota Nacom naca yawena. Nacom bara tsitecaeya naca cata daxita carepaya pejuntux coyenein po pejuntux coyenein xeina pia nacuatheicha. Bapo juntux coyenein naca catsiba xua wanantawenonaewatsi xua wanaca ajuntuxcoyenesu exanaenexa beta xua Nacom watsita jinompaenexatsi. ⁴Caena bayatha pewunaeya xua poxonaefeso nacua forotsina, Nacom naca wun duba xua piamaefeso tatsi wanaca exanaenexa tsane poxoru Cristo caemonaewanaca exanaewa tsane bapontha. Matautano Nacom naca wun duba xua bichocono watsita juntux coyene xanepanaenexa tsane bapon xua matauta jopa watsita natsicuentiswatsi tsane xua abe waexanaexae bapontha. ⁵Nacom pia wanaca antobewaxae caena bayatha naca yabara nanta cui yapu weta

xua pia pexui tatsi wanaca cana exanaewa tsane. Baxua Nacom naca cana exana xua pocotsiwa Jesucristo pia wanacata exanaexae. Nacom ichichipa exana baxua petsita xanepanaexaetsi. ⁶Daxota barabũ Nacom wũnae jainteibatsi pon bichocono pexeinya coyenewa exana poxonae naca yawena wanaca antobexae. Matautano Nacom bichocono wanaca antobexae amanaya daxitatsi caemonae naca cayawa exana Pexantotha, po Pexanto bichocono antobe. ⁷Nacom pia pin wanaca antobexae naca capanenebiya exana abe waexanae cuiru coyenein weya. Nacom tsitatsi xua jopa watsita natsicuentisiwatsi xua abe waexanaexae, yawa naca cayabara cui junteina barapo cui. Baxua exana poxoru Nacom Pexanto tatsi jana pichapabarena poxonae bexotsi, poxonae abe waexanae cuiru coyene naca yabara tsitũpa naetotha. ⁸Nacom naca tsita itapeinya xeina xua bichocono jopa juniya naca antobeyo. Matautano naca cana exana xua wayabara yaputaewatsi bapon. ⁹Nacom bayatha exana pocotsiwa xua caena bayatha juntucuru exana. Nacom naca yaputane exana xua wayaputaewa pocotsiwa bapon moya yawũn xeina xua jiwi jopa yabara yaputaeyo po coyene xua bapon ichichipa peexanaewa. Baxua xua pocotsiwa moya yawũn xeina caena bayatha Nacom juntucuru nanta xeina xua Pexanto peitorobiwa tsane po cae pin nacuathe tsique pon pewũn Jesucristo. ¹⁰Caena bayatha Nacom cayabara nanta xeina pocotsiwa xua exanaena. Barapo coyene exanaena po coyene xua daxita caetutsina pocotsiwan Cristo pecanamataxeinaewa tsane picoya xua xuan peitabocotha piawan xuano xua xuan po irathe piawan. Baxuan exanaena poxonae jopaena barapo matacabi xua poxonae po mataqueitha Nacom ichichipa beexanaena baraxua.

¹¹Daxita po coyenein Nacom exana, bapon exana po coyeneya xua ichichipa. Daxota caena bayatha Nacom pana wũn duba pata tanaexanaewa tsane piamonae tatsi poxoru Cristo caemonae wanaca exanaewa tsane bapontha. Daxita pocotsiwan xua Nacom pana cana exana caena bayatha bapon tsiwanaya juntucuru nanta xeina xua exanaena baxuan tsipei Nacom exana daxita xua pocotsiwan tsita wũnaetsi. ¹²Paxan, judiomonae pan, pomonae pan xua copiya pawũnae ewatan xua Cristo pepatopaewa tsane. Barabũ daxota Nacom bichocono wũnae pajainchin pexeinya peitũpanaewa peexanaeinxae. ¹³Pocotsiwa xua pexainyei jume diwesi, barapo diwesi apara Nacom pia pecapanenebiyae diwesi tatsi. Poxonae barapo pexainyei jume diwesi pajume taneme Nacom paca cana exana piamonae tatsi painya nejume cowũntsixaem Cristo painya nepaca capanenebiyaenexa. Bapoxonae Nacom tsita itapeinya xeina xua paxam piamonae tatsi pam poxonae paca cata pia Pejumope tũnaxũ tatsi. Bayatha Nacom yabara paca tsiwũnae muxu duta xua pinae paca catsina barapo pia Pejumope tũnaxũ tatsi. ¹⁴Nacom pia Pejumope tũnaxũ tatsi naca cata wanaca barũ poponaenexa.

Baxua naca tsita itapeinya xeina xua daxota xaniwaicha yaputainchi xua bexa ichawan xua Nacom naca catsina pocotsiwan yabara naca tsiwuna muXu duta xua naca catsina. Nacom baxua exanaena poxonae daxita cana exanaena piamonae tatsi, pomonae daxita bewa jume cowuntsina Jesucristo. Bapoxonae jiwi wuna jainchina Nacom bichocono peXeinya peitupanaewa peexanaeinxae.

**Meje yabara poxonae Pablo Nacomtha tawuca pomonae
pejume cowuntsi jiwi xua Nacom yaputane pecana exanaewa
tsane barapomonae pomonae pejume cowuntsiwi**

¹⁵Paca yabara jume tainchi xua paxam pinae beta pajume cowuntame Jesús, pon jiwi Pecanamataxeinaein. Matautano paca yabara jume tainchi xua pinae beta paantobem pomonae iru pejume cowuntsiwi. ¹⁶Daxota ataya pacata wuqueibatsi Nacom, janje: “Nacom maisa juntu coyene weiweinan xua Efeso tomarapiwi neyawenaewa, pomonae necajume cowuntsiwi”, jan. ¹⁷Wucan Nacom, Jesucristo Wanacanmataxeinaein, pia Nacom tatsi, pon Waxa pon bichocono peXeinya peitupanaewa peexanaein. Wucan xua painya nepaca cacatsinexa pia Pejumope tuxaxu tatsi painya neyaputaewa tsane pocotsiwan xua xainyei xua Nacom yabara. Matautano wucan xua painya beta neyaputaeponaenexa Nacom. ¹⁸Nacom wucan xua painya neyaputaenexa painya juntu coyeneintha. Bapoxonae paca itacupaena xua payaputaename pocotsiwa Nacom yabara paca tsiwun duba xua painya nexeiinaenexa pocotsiwa yabara paca tsiwuna muXu duba. iMaisa bichocono jopa juniyiyo xua pocotsiwa Nacom catsina pomonaetha pomonae pia pejume cowuntsi jiwithaxaetsi pocotsiwa bapon juntana jeba barapomonae! ¹⁹Matautano wucan xua painya neyabara yaputaewa tsane Nacom pia peayapusu itorobi coyenewa, po peayapusu coyenewa bichocono wuna xua jopa wetsiyo. Barapo peayapusu itorobi coyeneyatha Nacom naca yawena wajume cowuntsiwixae. ²⁰Barapo peayapusu itorobi coyenewa jupa po peayapusu itorobi coyenewatha Cristo asu exainchi petupa cuiru coyene weya xua Nacom exana. Barapo pia peayapusu itorobi coyenewatha Nacom Pexanto cuareta pia pecoxa weya xua peitabocotha xua Pexanto ainya cui cana exana. ²¹Nacom Pexanto cana exana xua Jesucristo toxeincha canamataxeina pomonaetha daxita pomonae ichamona canamataxeinatsi itabocotha, matautano xua barapo cae pin nacuathe. Matautano bapon canamataxeina daxita pomonaetha pomonae nacuan peewatsiwi, barichino pomonaetha pomonae piamona pematacaponaewichi. Cristo canamataxeina pia peayapusu itorobi coyenewatha, po peayapusu itorobi coyenewatha bichocono ayapusu beyacaincha ichamona pia peitorobi coyenewan tatsi. Po wun xua Jesucristo xeina xua “Cristo”, jeichichi barapo wun yabara matawun

dutatsi pia peexanaewa. Barapo wun bichocono peainya cui wun, beyacaincha ichamonae pewunxi, po wunxi xua yabara matawun dubatsi xua peexanaewa pomonae anoxuae jinompa iru pomonae bexa jinompaenano. ²²Nacom exana xua daxita coyenewantha Cristo itoroba pia peayapusu itorobi coyenewantha. Matautano Nacom exana xua Cristo daxita pepa pecanamataxeinaein piamonae daxita pomonae pejume cowuntsiwixaetsi. ²³Pomonae pejume cowuntsiwi Cristo barapomonae be bara Cristo pia pepon tatsi tsipei Cristo cana exana xua barapomonae caemonae naexana bapontha. Dapocotsiwa ajibi pocotsiwa Cristo petaseicaewatsi tsipei nantauta pomonae pejume cowuntsiwichi. Barichi dapocotsiwa ajibi pocotsiwa petaseicaewatsi pomonae Cristo pejume cowuntsiwichi tsipei Cristo ataya tsitecaeya baru popona barapomonae daxita nacuantha.

Meje yabara poxonae xua Nacom naca capanenebiya, wanaca antobexae

2 ¹Copiya bayatha poxonae jopa pajume cowuntsim Nacom bichocono abe paexana dubenanaebiyame. Matauta pajumefebame Nacom poxoru paxam be pomonae pewerapaewi pam jopa painya yawa jinompaexae Nacom pia Pejumope tuxaxu tatsi. ²Bayatha jopa xapain painompaem. Painompame icha barapo cae pin nacuathepiwi ichi xua bichocono abe exana dubenanaebiya. Paexaname bayatha xua caurimonae pia pentacaponaein tatsi painya nepaca cui itorobixae. Bapon canamataxeina caurimonae po caurimonae jinompa itabocotha barapo nacue matatsuntha xua beyano Nacom pia nacua beicha tatsino. Barapo caurimonae pia pentacaponaein tatsi, pomonae Nacom jumefebatsi, barapomonae juntu coyene itorobatsi xua abe peexanaewa tsane. ³Caena bayatha waxainchi barichichi exana dubenanaebiyatsi barapocotsi coyenein xua abe. Exainchi pocotsiwa xua ichichipatsi xua wajuntu coyenewa naca cui itoroba xuano xua wapepon naca cui itoroba. Tsipei waxainchi jiwichi xua yacuiya naexanatsi xua abe waexanaewa, daxota bayatha Nacom anaya nanta xeina xua naca atene exana icha ichamonae ichichi xua atene exanatsi abe peexanaexae. ⁴Daichitha Nacom jopa juniya naca matateicaeyo xua wanaca yawenaewa bichocono wanaca antobexae. ⁵Bequein poxonae cataunxuae bichocono abe exana dubenanaebiyatsi waxainchi, xua daxota be petupaewi jinompatsi abe waexanaexae, bapoxonae Nacom naca yawena. Baraxua be bapon naca baru ajuntucoyenesu xua Cristo wanaca cana exanaexae xua caemonae naexainchi bapontha. Nacom naca capanenebiya saya apara poxoru wanaca antobexae. ⁶Wajume cowuntsixae Jesucristo, waxainchi Nacom tsitatsi xua apara be bara bayatha bapon naca asu exana petupae coyene weya icha Cristo Jesús ichichi xua asu exanatsi petupae coyene weya. Matautano waxainchi tsitatsi xua apara be bara bayatha naca exana xua

waenaewa ichaxota Cristo Jesús eca pia nacuatheicha. ⁷Nacom juntucuru baxua exana petsita itapeinya xeinaenexa xua xeina pia pin peantobe coyenewa xua waxainchi nexa xua daxita matacabintha tsoponae tsane. Nacom naca tsita itapeinya xeina xua bichocono naca antobe poxonae naca exana xua caemonae naexanaeinchi Cristo Jesustha. ⁸Tsipei Nacom paca antobe daxota paca capanenebiya poxonae pajume cowuntame bapon. Apra jopa baxua painya coutha paexanaem, apra Nacom jame baxua amanaya paca cana exana. ⁹Nacom apra jopa baxua paca cana exanaeyo xua painya nenacuichixae. Icha paca itacupa xua poxonae payabara nacuichipame xua painya nepaca capanenebiyaenexa bapoxonae be painya neatsacae jiwi pam tsipae xua poxonae ichuntha pajam: “Beta paexanan daxota Nacom pana capanenebiya”, pajam. ¹⁰Nacom naca exana xua pena juntu coyenewatha jinompatsi Cristo Jesús nexa xua beta xanepanaya waexaneibinexano bapon nexa poxonae jinompatsi. Caena bayatha baxuan Nacom yabara nanta xeina xua naca juntu coyene cana cui weta exana xua po coyeneya waxainchi beta wataxanaewa tsane ichamona.

Meje yabara po juntu coyenetha Nacom naca cana exana xua juntea wajinompawea caemonae wanaexanaexae Cristotha

¹¹Poxonae panaexaname jopa panaexanaem judiomona. Paxam pomona jopa judiomona painya nanaexanae jiwixaem pana nacui yabara juntanainare xua eta po jiwi pamda caena bayatha poxonae jopa pajume cowuntsim. Judiomona paca yabara jei: “Barapomona jopa pewi thabiwichi xua ichaxota pia penareixacaenaewa xua petsita itapeinya xeinaewa tsane xua barapomona Nacom piamona”, paca yabara jei. Judiomona pia coutha nayabara jei: “Waxainchi pomonaetsi, pomona naca wi thaba xua ichaxota wanareixacaenaewa watsita itapeinya xeinaewa tsane xua Nacom piamonaetsi”, nayabara jei. Barapo pewi thabi coyene xua ichaxota pebiwi penareixacaenaewa saya jiwi pia coya nacanautsiya exana. ¹²Bayatha barapo dapaetha poxonae cataunxuae jopa pajume cowuntsim jopa Cristo payabara yaputaem. Matautano paxam be painya nenanapaincha jinompawei pam xua icha nacia werena painya neponaewi xua jopa Israel nacuapiwi jiwana pam. Po petsiwunae yabara muxu dutsi coyenewan xua Nacom juntucuru nanta xeina xua caemonae naexana piamonaetha, xua judiomonaetha, barapo coyenein apra jopa paxam nexa. Matautano pajinompame barapo cae pin nacuathe ichitha jopa pawunae ewatsim xua pocotsiwa xua wunae xua Nacom exanaena paxam nexa cataunxuae jopa painya nejume cowuntsixae. Tsipei jopa painya neyabara yaputae jiwi pam Nacom. ¹³Ichitha anoxuae Cristo Jesús paca exana xua caemonae pana naexaname bapontha. Paxam pomona bayatha jopa Nacom painya

nejume cowũntsi jiwi pam xua jopa painya yabara yaputaexaem bapon. Ichitha anoxuae pajume cowũntame painya neyabara yaputaexae Cristo Jesús, pon naetotha painya abewan paca yabara tsitupa, poxonae jana pichapabarena poxonae bexotsi. ¹⁴Cristo meisa bapon naca cata po juntu coyenewatha xua ichamonaetha xuya jũntema jinompa exanatsi. Cristo exana xua caemonae naexana pomonae xua judiomonae irũ pomonae jopa judiomonae naexanaeyo. Cristo cui weraweraca exana po juntu coyenein xua judiomonae irũ pomonae jopa judiomonae naexanaeyo penaaitafaetabi jiwi naexana xua saya be caemonae penaexanaewa tsane. Baxua exana poxonae naetotha tsitupa jiwi. ¹⁵Poxonae Cristo naetotha tupa bapoxonae bapon cana exana xua Moisés pia peitorobi coyenewa tatsi jopa equeicha xeinaeyo peyapusũ itorobi coyenewa xua jiwi peitorobiwatsi pocotsi coyenein jiwi bewa exanae. Bapon Cristo cana exana xua barapomonae Cristo caemonae pebarũ naexanaewa tsainchi pomonae xua copiya pia peaitafaetabi jiwixaetsi. Poxonae Cristo baxuan cana exana bapoxonae barapo bicheitomonaebe jũntema nabarũ jinompa cana exana. ¹⁶Petupaexae naetotha Cristo exana xua equeicha barapomonaebe jopa nabiyõ. Mataũtano bapoxonae Cristo naita coxone exana xua barapomonaebe jũntema pejinompaewa Nacomtha xua icha be jopa ichiyo xua poxonae copiya jinompa xua Nacom pia peaitafaetabi jiwichi. Cristo exana xua barapomonaebe Nacom caemonae exainchi.

¹⁷Cristo patopa po cae pin nacuathe tsique. Bapon daxita paxam paca tsipaeba Nacom pia pexeinya jume diwesi tatsi. Barapo juntu coyenewatha jiwi equeicha caewa Nacom ita coxonatsi xua Nacom jũntema petsita jinompaewa tsainchi. Daxita paxamtha paca tsipaeba barapo diwesi pomonaetha irũ pam pomonae copiya jopa Nacom payabara yaputaem, xua pomonae jopa judiomonae pam. Irũ tsipaebatsi pomonae yatsicaya judiomonae pomonae Nacom yaputainchi pejume cowũntsixae. ¹⁸Cristo jiwi petsitupaexaetsi abe pia peexanae coyenewan tatsi daxota Nacom pia Pejumope tunaxũ tatsi yawena xua pomonae judiomonae irũ pomonae jopa judiomonae naexanaeyo be caemonae naexanabe xua cae axa xeina, bapon Nacom. ¹⁹Daxota anoxuae jopa be painya nenanapaincha jinompaewi pam xua be icha nacua werena painya neponaewi. Paxam irũ ichamonae pomonae Nacom pejume cowũntsiwirũ be pomonae cae nacupiwĩ pam. Paxam Nacom piamonae jiwana tatsi pam. ²⁰Poxonae ba jiwi Nacom pin pia bo acaba copiya matha beta noba po iboton xua iratha tabũ caumena. Nexata beta nota po iboto xua ainya cui xua po iboto bo daunweya babatanota po iboto xua epataũta botabiya. Bapoxonae nanta cajejebabapona icha iboton, xua pepa bo exana. Icha pebiwi ichi poxonae bo acaba, Nacom piamonae bara cana jũtsiya cana ichi. Pomonae Cristo pia peitorobi jiwi tatsi irũ pomonae Nacom pia peitorobi jume pepaebiwĩ barapomonae be bara pocotsi iboton

xua tabu caumena tsipei barapomonaе copiya paca cuiduba Nacom Pejume Diwesi tatsi. Iru Jesucristo be barapocotsi ainya cui iboto po iboto daunweya babatanota po iboto epatauta botabiya, tsipei Cristo paca yawena xua painya nejume cowuntsiwa bapon. Iru paxam be po iboton xua jiwi nanta cajejebabapona, pomonaе penanta carubenaе jiwi pam, tsipei cotacaya painya nejume cowuntsixae. ²¹Cristo piamonaе bara cana jutsiya ichiya cana exana, icha po iboto ichi xua ainya cui xua bo daunweya babatanota exana. Cristo pon jiwi Pecanamataxeinaein, exana xua piamonaе tatsi pinmonaе tsoponaе xua xanepanaya caemonaе nabaу jjinapona, pomonaе Nacom tsita juntu coylene xanepanatsi. ²²Poxonaе jiwi weta barapo pin bo, bapoxonaе cana exana xua barapo bo apara Nacom pia bo tatsi ichaxota Nacom popona. Nacom paca cana exana xua paxam iru daxita ichamonaе pomonaе iru pejume cowuntsiwi Nacom, caemonaе pana naexaname xua Nacom pia Pejumope tunaxu tatsi pia paca baru jinompaenexa icha Nacom ichi xua pia pin botha popona.

Meje yabara poxonaе Nacom Pablo itorobatsi xua pecueicueijiwa Nacom Pejume Diwesi pomonaetha pomonaе jopa judiomonaе naexanaeyo

3 ¹Xan, Pablon, jiwi pecubi botha ecan yabara tanatsipei cueicueijeixae Cristo Jesús poxonaе bapon yabara tapaca cuidubiwatsi pomonaе pam jopa judiomonaе panaexanaem. ²iBara pajume taneme xua Nacom necata barapo tatanacuichiwa xua inta bichocono wunaе! iNacom neitoroba tana neantobexae xua tapaca cuidubinexatsi tapaca yawenaenexatsi! ³Nacom ituta xua po coylene xua moya yawun xeina po coylene xua Nacom capanenebiyaena jiwi xua jiwi copiya jopa yabara yaputaeyo. Nacom neyaputane exana barapo coylene xua moya peyabara cui yawun xeinaewa po coylene bexa exanaena xua jiwi jopa yabara yaputaeyo. Baxua bayatha yabara pacata tinatsi xua imoxoyo diwesi tsecae. ⁴Poxonaе barapo carte payorobiname payaputaename xua bara xan yaputan po coylene xua Cristo moya yabara cui yawun xeinatsi po coylene xua bexa Nacom exanaena xua jiwi jopa yabara yaputaeyo. ⁵Bayatha jiwi jopa yaputaeyo po coylene xua Nacom Cristo moya yabara cui yawun xeinatsi po coylene xua Nacom exanaena. Ichitha anoxuae Nacom pia Pejumope tunaxu tatsi baxuan yaputane cana exana pomonaetha pomonaе pia coya Nacomtha nacana exana xua Nacom petanacuichiwa tsainchi pomonaе Cristo Jesús pia peitorobi jiwixae tatsi, matautano Nacom pia peitorobi jume pepaebi jiwitha tatsi. ⁶Meje baxue xua pocotsiwa moya peyawun xeinaewa: Pomonaе jopa judiomonaе naexanaeyo barapomonaе iru xeinaena po coylene xua Nacom cata judiomonaetha po coylene bichocono wunaе xua bayatha Nacom juntana jeba. Barapomonaе pomonaе jopa judiomonaе

naexanaeyo Jesucristo pejume cowuntsixaetsi caemonae nanaexana pepa judiomonaetha pomonae irurũ Cristo Jesús pejume cowuntsiwixaetsi. Barapomonae irũ xeinaena po coyene Nacom yabara tsiwũnae muxu duta judiomonaetha xua Cristo Jesús yabara. Barapomonae pomonae jopa judiomonaetha naexanaeyo daxita baxuan irũ xeinaena poxorũ jume cowuntarũ Nacom pia pecapanenebiyae diwesi jume.

⁷Nacom neitoroba xua tacueicueijeíwa barapo pexeinya jume diwesi amanaya tatanacuichixae Cristo. Nacom necata barapo tatanacuichiwa pia tana neantobexae xua tayawenaewa tsane ichamonae. Matautano Nacom necata pia peyapusũ itorobi coyenewa xua tacueicueijeíwa tsane barapo pexeinya jume diwesi. ⁸Pomonae xua be conotha ainya cui xua Cristo piamonae tatsi barapomonae ainya cui beyacaincha xua xan. Daichitha Nacom necata barapo tatanacuichiwa xua inta bichocono wũnae. Nacom neitoroba xua tacueicueijeíwa tsane pia pexeinya jume diwesi pomonaetha pomonae jopa judiomonaetha naexanaeyo. Cueicueijan po pexeinya jume diwesi xua Cristo bichocono peantobexae jopa juniya yawenaeyo barapomonae pomonae jopa judiomonaetha naexanaeyo. ⁹Matautano Nacom neitoroba xua daxita jiwitha yabara yaputane taexanaewa tsane po coyene xua Nacom exanaena bexa tsane, po coyene Nacom moya yawũn xeina. Barapo coyene Nacom pon daxita peforotsin, caena bayatha moya nayawũn xeina xua jiwi jopa peyaputaewa tsane xua pocotsiwa bapon exanaena. ¹⁰Anoxuae Nacom yaputane exana matatsunpiwi, pomonae itoroba itabocotha, matautano pomonae pecanamataxeinaewa itabocotha. Barapomonae Nacom yaputane exana pocotsiwa bapon moya yawũn xeina caena bayatha xua jiwi jopa yabara yaputaeyo. Barapo itabocopiwi nacuiduba xua bara Nacom bichocono yaputane daxita carepaya coyenewan. Baraxua yaputane poxonae tane xua pomonae judiomonaetha matautano pomonae jopa judiomonaetha naexanaeyo daxita barapomonae caemonae naexana pejume cowuntsiwichixaetsi Cristo Jesús. ¹¹Nacom exana baxua icha be pocotsi coyeneya caena bayatha yabara nanta xeineibapona. Bapon baxua exana Jesucristo pon Wanacanamataxeinaein petũpaexae naetha. ¹²Naca itacũpa xua watsipaebiwatsi Nacom wajume cowuntsixae Cristo. Waxainchi yaputainchi xua bapon bara naca jume tane caemonae wanaexanaexae Cristotha, daxota cui tsacatsacapiya watsipaebiwa Nacom. ¹³Daxota jopa ichichipaeinyo xua paajũntũcoyenerewiya jinompame xua ichamonae atene tana neexanaexae paxam nexa. Ichitha jame bewa baxua paichichipaem tsipei baxua jame paca yawena.

Meje yabara xua Cristo jiwi peantobewatsi

¹⁴Poxonae yabara nanta xeinan xua po coyenewa xua Nacom exana bapoxonae tantabocototha uncuan xua tatsita itapeinya xeinaewa tsane

xua barũ cui itura jinan Waxa pon itabocotha pepoponaein. ¹⁵Daxita Nacom piamonae pomonae pejume cowũntsiwichi, pomonae itabocopiwi irũ pomonae po irathepiwi, daxita barapomonae Nacom tsitatsi xua barapomonae be caemonae naexana. Bapon daxita barapomonae paxa tatsi. ¹⁶Nacomtha pacata wũcatsi. Tsipei Nacom pexeinaexae peitaboco beicha pocotsiwa jopa juniyiyo xua bichocono wũnae daxota jan: “Nacom care Efeso tomarapiwi xua bichocono jinya neayapusũ itorobi coyenewa. Barapomonae nejumopetha jũntũ coyene daunweya jinompa exande. ¹⁷Barabũ Cristo barũ poponeibina barapomonae pejume cowũntsixaetsi. Barabũ barapomonae bichocono antobe jiwi bichocono pejũntũ coyene yũcaewaxaetsi peantobe coyenewa. ¹⁸Barabũ barapomonae beta yabara yaputaena Cristo pia peantobe coyenewa tatsi xua irurũ daxita ichamonaerũ yaputaena pomonae pejume cowũntsiwi. Barapon Cristo pia peantobe coyenewa tatsi bichocono ayei xainto jũntũ coyenewa. ¹⁹Cawũcatsi Nacom xua barapomonae barabũ yaputaena barapo coyene po coyene Cristo pia peantobe coyenewa tatsi, xua po peantobe coyenewa ayei xainto jũntũ coyenewa xua jiwi jopa itacũpaetsi xua peyabara yaputaewa. Cawũcatsi xua barapomonae nejũntũ coyene yũca exanaenexa daxita jinya nejũntũ coyenewatha.

²⁰“Wũnae cajaintatsi poxoru caitacũpa xua bichocono pata tana neyawenaewam beyacaincha xua pata tacawũcaewatsi, xuano beyacaincha pata nanta xeinaewa. Baxua painta exaname poxonae jinya neayapusũ itorobi coyenewa nacuita pata jũntũ coyenewatha. ²¹Barabũ daxita pomonae pejume cowũntsiwi pomonae caemonae naexana Cristo Jesustha wũnae cajainchina xua ataya petsitecaeponaewa tsane. Je bara ichi tsane”, jan xua pacata wũcatsi Nacomtha.

**Meje yabara xua Nacom pia Pejumope tũnaxũ tatsi cana
exana xua caemonae naexana Nacom piamonae tatsi**

4 ¹Tatanacuichixae Jesucristo pon jiwi Pecanamataxeinaein daxota jiwi neeta jiwi pecubi botha. Pecono jumetha paca muxuwetatsi xua beta xanepanaya painya nejinompaewa xua Nacom itapeta painya nepaca wũn dubixae painya nejume cowũntsixae bapon icha be pocotsi coyeneya xua Nacom tsita xanepanatsi. ²Ita ururanaya pajinompeibare xua jopa painya neatsacaewa tsane. Mataũtano jume xanepanaya nantiya pana natsipaebeibare xua jopa paantũtsaxande. Mataũtano saya jopa paaitaconaeinde xua daxota jũntema painompaename poxonae bequein ichamonae abe pacata exana. Mataũtano patsita itapeinya xeinare xua nantiya pana nacui yabara antobem pocotsiwa bequein jopa pana nacui coyene jũpaem. ³Nacom pia Pejumope tũnaxũ tatsi paca cana exana xua caemonae painya nenaexanaewa tsane. Daxota peajũntũcoyenesũwatha paexande daxita coyeneya xua caemonae jũntema painya nenabarũ

jinompaewam tsane. ⁴Paxam pomonae painya nejume cowuntsi jiwixae Cristo Jesús daxota caemonae paca exana. Bequein daxita carepaya paxam barompaya paxename Nacom pia Pejumope tunaxu tatsi, ichitha barapo pejumope saya bara caein. Nacom yabara paca wan duba xua daxita paxam painya nexeinaewa tsane cae coyenewa xua po coyene peburuya pana nabaru wunae ewatame pocotsiwa xua bexa Nacom exanaena. ⁵Matautano bara caein pon jiwí Pecanamataxeinaein. Matautano cae coyenewa xeinatsi po coyenewa xua wajume cowuntsiwa Cristo. Matautano saya cae wantha nabautisabatsi xua Cristo pewantha tatsi. ⁶Matautano bara caein Nacom pon Waxa xua daxitatsi waxainchi. Bapon daxita jiwí canamataxeinatsi, matautano daxita carepaya nacuantha popona. Matautano daxita waxainchi carepaya naca baru popona.

⁷Daxita waxainchitha seicaya cabarompaya naca cana juntu cui coyene duba exana pocotsi coyeneintha xua watsita exanaewa tsane bapon. Barapo coyenein Cristo naca catsiba po coyenein jiwana xua bapon nawita xeina icha bapon ichichipa. ⁸Daxota Nacom Pejume Diwesitha jeye Cristo yabara:

“Bapon athabe juinya taju beicha.

Poxonae athabe juinya baru juinya pomonae
pia peitafaetabi jiwichi petsita
itapeinya xeinaenexa xua amanayaba
barapo peitafaetabi jiwichi.

Matautano bapon pia pejume cowuntsiwichi
catsiba po juntu cui coyenewantha xua
barapomonae Nacom petsita exanaenexatsi”,
jei Nacom Pejume Diwesitha.

⁹¿Eta xua metha baxua caunuta poxonae paeba xua “athabe juinya taju beicha”? jei. Baxua caunuta xua copiya matha Cristo po irathe patopeica xua bapoxonae equeicha caibe juinya athabeicha itaboco beicha. ¹⁰Pon xua po irathe patopeica, barichi bapon athabe juinya taju beicha xua bapon pepoponaewa tsane daxita nacuantha xuano daxita itabocotha. ¹¹Cristo catsiba jiwitha xua seicaya barompaya pejuntu cui coyenein. Ichamonaetha cana exana pomonae pia peitorobi jiwixae tatsi. Ichamonaetha cana exana pomonae pecueicueijeji jiwí pia peitorobi jume diwesi tatsi. Ichamonaetha cana exana pomonae xua pecueicueijeji dubenanoutsiwí Nacom pia pexeinya jume diwesi tatsi xua pecapanenebiyae diwesi jume. Ichamonaetha cana exana pomonae eena jiwí pomonaetha pomonae pejume cowuntsi jiwí. Ichamonaetha cana exana pomonae xua pecuidubi jiwí pomonaetha pomonae pejume cowuntsiwí. ¹²Poxonae barapo coyene Cristo exana, piamonae cana juntu coyene wetsiya cana exana xua beta petaexanaewa tsainchi pia

petanacuichiwa tatsi. Bapoxonae daxita piamonae tatsi mataropeichiya ajuntuyapusya jume cocowantapona pomonae piamonaexae tatsi pomonae bara be Cristo pia pepon tatsi. ¹³Baxua Cristo exana xua beya waxainchi caemonae wanaexanaewa tsainchi xua caemonae wanabaru jume cowuntsixaetsi Cristotha. Bapoxonae naexanatsi xua peburuya caemonae wanabaru yabara yaputaewa tsainchi Nacom Pexanto tatsi. Matautano bapoxonae yatsicaya beta jume cowuntatsi, bapoxonae jinompatsi be pomonae bayatha pinyontsi xua pocotsimonae itacupatsi xua Nacom beta petsita jinompaewatsi. Bapoxonae wajuntũ coyene naca cayabara cui wetsiya exana xua wajuntũ coyene xanepanaewa icha Cristo ichi xua bichocono pejuntũ coyene xanepanaewa. ¹⁴Bapoxonae jopa be pexui natsicotae tsainchi equeicha. Pexui ba ainya muxu xeina ichawa beya ba jume cowunta xua pocotsi coyenein xua poxonae nacuidubeiba xua poxonae cuiduba pomonae jiwi pemuxuitorobiwi. Barapo pemuxuitorobi jiwi yaputane nawita po juntũ coyeneintha xua jiwi pemuxujainyabiwatsi. ¹⁵Jame bewa pexainyei jume tsipaebichi ichamonaetha po coyeneya xua barapomonae yaputane xua waxainchi antobetsi barapomonae. Bapoxonae beta xanepanaya exanaeinchi wanajuntũ coyene xanepana exanaponaenexatsi daxita coyenewantha xua icha be Cristo ichi. Bapon canamataxeina pomonae pia pejume cowuntsiwichi. Bapon bara be pentasipa pomonae pejume cowuntsiwichi be bapon pepon tatsi. ¹⁶Cristo canamataxeina pia pejume cowuntsiwichi. Matautano cana exana xua barapomonae barompaya xeina pia petanacuichiwantsi. Bequein barapomonae piawan barompaya xeina ichitha Cristo cana exana xua caemonae nantiya nayawena be caemonae naexana. Poxonae barapomonae barompaya piawa beta exanapona pia penacuichiwan, bapoxonae be caemonae beta naajuntũcoyenesũ xanepana eexanapona, nantiya penaantobexae.

**Meje yabara po pena juntũ coyenewatha
wajinompaewa wajume cowuntsixae Cristo**

¹⁷Anoxuae paca tsipaebatsi xua painya tapaca muxuwetsinexatsi, Cristo pon jiwi Pecanamataxeinaein taneitorobixae: Jopa bewa pajinompaem icha barapo cae pin nacuathepiwi ichi xua poxonae jinompa poxonae jopa Nacom yaputaetsi. Pocotsiwa xua barapomonae pia penanta xeinae coyenewan tatsi, jopa ainya cuiyo. Jopa pejuntũ coyene yawenaexaetsi barapo penanta xeinae coyenewantha. ¹⁸Barapomonae pia peyaputae coyenewan tatsi jopa xapain pepa peyaputae coyenewiyo. Barapomonae jopa xeinaeyo peajuntũcoyenesũwa pocotsi peajuntũcoyenesũwa Nacom cata piamonae. Barapo coyene barapomonae jopa xeinaeyo poxoru aichaxaibi xua Nacom peyabara peyaputaewatsi, xuano poxoru barapomonae najuntũ coyene ararana xua jopa peichichipaexae xua

Nacom peyabara jume taewatsi. ¹⁹Barapomonae jopa ajuntucoyeneuriyo poxonae abe exana. Matautano barapomonae atsaquiya abe eexanapona, xua pecupaewatsi atsaxa mera yawa weiweina ichamonae piseurixitha tatsi. Barapomonae cui xeica xua daxita coyenewan abe peexanaponaewa. ²⁰Ichitha poxonae ichamonae yabara paca cuiduba Cristo, jopa apara paca cuidubiyo barapo coyene xua abe painya neexanaewa tsane. ²¹Xaniwaicha yabara pajume taneme Cristo, xuano piamonae tatsi painya nenaexanaewa poxonae ichamonae paca cuiduba po pexainyei jumein xua pexeinya jume diwesi xua Jesucristo yabara. ²²Pana nacui barapende po juntucoyene xua bayatha paexaname poxonae jopa cataunxuae pajume cowuntsim. Barapo juntucui coyene bichocono abe, tsipei paca cana exana xua paexaname pocotsiwan xua painya coya paichichipame poxonae paca muxuitoroba exana xua daxota abe painya neexanaewam. ²³Pacopare xua bara Nacom paca juntucoyene xanepana exanaponaena, xua daxota pena coyene painya nenanta xeinaponaewa tsane. ²⁴Painompare pena juntucoyenetha, po juntucoyene Nacom exana xua painya paca catsibinexa. Bapoxonae paxeinaename be pocotsi juntucoyene Nacom xeina. Poxonae paxeiname barapo juntucoyene po juntucoyene xua pexainyeiwa, bapoxonae beta nantiya pana nabaruc jinompame yawa xua bichocono paca tsita xanepana Nacomtha.

²⁵Daxota anoxuae jopa nantiya bewa pana namuxuitorobim. Bewa daxita pam xanepanaya patsipaebim pomonaetha pomonae irucujume cowuntsiwi, tsipei waxainchi daxitatsi caemonae naexanatsi Cristotha.

²⁶Icha paanaepaname jopa pacopatsinde xua painya juntucoyene paca itoroba xua anaya anaepanaya abe painya neexanaewa ichuntha. Icha paanaepaname jopa abe paexanaeinde. Came jopa paanaepana dubenanaebiyaeinde xua beya quirei tsanaicha, saya jame bara caetotha pande. ²⁷Jopa pacopatsinde xua bara caurimonae pia pentacaponaein tatsi paca juntucoyene jujuta abe painya neexanaewa tsane.

²⁸Pon xua pecaibin, bucujopa equeicha caibeibiyo. Bewa jame bapon tsinacuichina pocotsiwa xua xainyeya yabara nacuita xua jopa naerabiyo. Bapoxonae bapon itacupatsi xua ichamonaetha xuya catsina pomonaetha xua acopeibiwi pomonae jopa xeinaeyo xua pocotsiwa nantawenona.

²⁹Jopa ajumebeya pacueicueijam tsurubenanaebiyaeinde. Jame maisa jume xanepanaya pacueicueijam tsurubenanaebiyama. Papaebare pocotsi jumeintha xua ichamonae jume cocowuntapona exanatsi po jumeintha xua jiwu muxu xeica exanatsi xuano xua yawenatsi po jumein xua paca jume tane. ³⁰Nacom pia Pejumope tuncaxu tatsi jopa pajuntucoyene wecoyei exanaeinde xua painya nepaca cui taexae xua paexaname. Tsipei paca baruc popona Nacom pia Pejumope tuncaxu tatsi, baraxua tsita itapeinya xeina xua bara xaniwaicha Nacom piamonae tatsi pam.

Nacom pia Pejumope tñaxu tatsi naca juntu coyene ararana wanaca yawenaenexa beya poxonae po mataqueitha Jesucristo naca capanenebiya exanaena.

³¹Jopa paxeinaeinde painya juntu coyenein weya po coyenein xua ichamonae payabara juntu ajom xua came bichocono painya neyabara nanta xeinaexae xua ichamonae abe pia pacata exanaexae. Matautano jopa paxeinaeinde po coyene xua jemeicha anaya paexaname. Matautano jopa paxeinaeinde po coyene xua saya bichocono panthuthu anaepaneibame. Matautano jopa paxeinaeinde po coyene xua tsümü jume pabarü paebame ichamonae. Barichi jopa paxeinaeinde po coyene xua ichamonae pabiataneme. Matautano daxita jopa paxeinaeinde po coyenein xua bichocono paaitafaetabim ichamonae. ³²Jame seicaya maisa nantiya caemonae xanepanaya pana nata exande. Matautano nantiya pana naweyataema xua nantiya painya nenayawenaewam tsane. Matautano nantiya pana nacui yabara juntemainare xua abe nantiya pana nata exaname, icha Nacom paca yabara ichi xua paca cayabara juntemaina abe painya neexanae cuiru coyenein Cristo painya nepaca tsitüpaexae poxonae naetotha tupa exanadutatsi poxonae bexotsi.

**Meje yabara xua po juntu coyeneyatha bewa
jinompaena Nacom pia pexui tatsi**

5 ¹Tsipei paxam Nacom pia pexui tatsi pam xua bapon bichocono painya nepaca caantobe jiwi pam, daxota bewa pacui jontsiya jinompaename icha bapon ichi poxonae popona. ²Nantiya pana naantobeya jinompare icha Cristo ichi xua naca antobe. Bapon Cristo pia pepon nacaenaeta xua naca tsitupa xua abe waexanae cuiru coyenein poxonae bexotsi. Baxua be poxonae icha duwei ichichi xua poxonae jiwi tsibexotsi xua daxota barapo jiwi jopa penatsicuentsiwa xua abe peexanaexae Nacomtha. Bapoxonae Nacom tsita xanepanatsi barapo jiwi. Barichi xua Cristo exana Nacom tsita xanepanatsi icha be pocotsi duwei tuxusi xeicaewa ichi xua poxonae jiwi duwei tauta xua Nacom pecatsinexatsi.

³Tsipei paxam Nacom pia pexui tatsi pam, daxota jopa bewa paexanaem po coyenein xua daxota ichamonae pomonae painyamonae paca yabara paeba xua abe paexaname. Matautano jopa bewa pana nasi cui matacaetsim xua paweiweiname xua jopa bequein painya seuri jiwi. Jopa bewa payabara paebim po jume xua jiwi aura exanatsi. Matautano jopa bewa bichocono painya ita copeichi xua payabara uwame xua ichamonae xeina. ⁴Jopa nantiya pana nayabara yuyjande. Matautano jopa nantiya pana najume cui caponaeinde po jumein xua jopa wunaeyo. Matautano jopa nantiya tsümü jume pana nayabara paebinde. Daxita barapo coyenein bichocono abe. Jame maisa bewa itapeta Nacom

wūnae pajainchim painya nepaca capanenebiyaexae barapo coyenein weya. ⁵Tsipei paxam bayatha payaputaneme xua Nacom cana exanaena pomonaetha pomonae meje: Pomonae xua penasi cui matacaetsiwa xua jopa poxonae piseuri jiwi, yawano pomonae xua yabara paeba po jume xua jiwi aura exanatsi, yawano pomonae bichocono pitacopeichi xua yabara uwa xua ichamonae xeina. Nacom tsita abetsi barapo coyenein icha tsita ichichi xua poxonae jiton bichocono beita cui jichatsi xua wūnae jainta ibo nacom. Pomonae barapo coyenein exana bapomonae bapana jopa itacupaetsi xua jiwi itorobiya peewatsiwatsi xua ichaxota Cristo itorobiya pecanamataxeinaewa jiwi xua irū ichaxota barichi Nacom. ⁶Jopa pacopatsinde xua ichamonae paca necamuxitorobiwa peyabara paebixae barapo coyenein, po jumeintha xua jopa xainyeyo. Poxoru jiwi peexanaexae barapo abe peexanae coyenein daxota Nacom anaya peraxa exanaena barapomonaetha. Nacom anaya peraxa exanaena barapomonaetha tsipei jopa jume jejeyo pocotsiwa xua Nacom itoroba. ⁷Barapomonaetha jopa imoxoyo pacuicuinaeinde, pomonae Nacom jopa jume jejeichi.

⁸Paxam copitha abe paexaname jopa painya yabara yaputaexaem Nacom. Baxua be poxonae pomonae pona pequireiwatha jopa beta ponaeyo jopa beta penecotsixae. Ichitha anoxuae beta paexaname painya yabara yaputaexaem Nacom pon jiwi Pecanamataxeinaein. Baxua be poxonae pomonae pona, poxonae pentha, beta pona beta pia petaexae. Pajinompare beta painya nejinompaenexa Nacom nexa icha pomonae ichi poxonae pona poxonae pentha. ⁹Pomonae yawa jinompa Nacom barapomonae beta jinompa icha pomonae ichi xua poxonae beta jinompa poxonae pentha. Barapomonae peyawa jinompaexae Nacom exaneiba pocotsiwa xua wūnaeya peexanaewa yawa xua pocotsiwa tsita xanepanatsi Nacom, yawa xua pocotsiwa pexainyeiwa. ¹⁰Incane pana nacuidubare pocotsiwa xua Nacom pon jiwi Pecanamataxeinaein ichichipa pocotsiwa Nacom tsita xanepanatsi. ¹¹Jopa paexanaeinde pocotsiwa jopa ainya cuiyo pocotsiwa ichamonae exana pomonae xua be poxonae pequireiwatha jinompa poxoru Nacom jopa peyabara yaputaexaetsi. Jame maisa barapomonae patsita itapeinya xeinare pocotsiwan xua barapomonae abe peexanaewanxae. ¹²Icha payabara paebichipan po coyenein barapomonae abe peexanaewa, bichocono aura pana exanaetsipa pocotsiwa namicha peexanaewa barapomonae tsipei bichocono abe. ¹³Poxonae pecoicha pentha exana poxonae quirei bapoxonae daxita pichiwan beta pataneme pentha perubenaexae. Barichi poxonae barapomonae jume tane po jumein xua yaputane exainchi, bapoxonae tsita itapeinya xeinaeinchi xua pocotsiwa namicha exana, apara deta cou abe. Bapoxonae barapomonae itacupatsi xua naexanaena Nacom piamonae tatsi. ¹⁴Daxota Nacom piamonae tatsi ichūn yabara jeichi:

“Nacui cayabara cananta xeinatabare,
tsipei xam be pon abe neexanaein.
Natsixire pia xainya weya tatsi pomonae
be petupaewi pejinompaewi jopa
tana nejume cowuntsi jiwixae.
Cristo cacana exanaena xua yabara
neyaputaewa bapon pocotsiwa xua
pia pexainyei coyenewa tatsi”,
jei xua ichun yabara paebatsi.

¹⁵Dota pam, xua abe painya neexanaewa. Jame maisa xanepanaya pajinompare. Jopa pajinompaeinde icha be ichi poxonae jinompa pomonae Nacom jopa jume cowuntsiya yaputaetsi. Barapomonae jopa peyaputaewi. Jame maisa pajinompare icha be ichi poxonae jinompa pomonae jume cowuntsiya peyaputaewi Nacom. Barapomonae peyaputaewi. ¹⁶Beta pa-eexanaponde daxita coyeneya xua paca itacupa poxonae cataunxuae anoxuae pajinompame, tsipei barapo matacabintha jiwi abe bichocono peexanaewi. ¹⁷Jopa pajinompaeinde icha be ichi poxonae jinompa pomonae amameibatsi jopa Nacom peyabara yaputaexaetsi. Jame maisa payaputaeya exanaponde pocotsiwa xua Cristo ichichipa, pon jiwi Pecanamataxeinaein. ¹⁸Jopa pana nacupa exanaeinde peatsaxa meran xua jiton acoyenebeya exanaeya exainchi. Jame maisa Nacom pia Pejumope tunaxu tatsi pacopabeibare xua daxita bara paca juntu coyene itorobeiba xua beta painya neexaneibiwa tsane. ¹⁹Nantiya pana natsipaebare pocotsiwa xua Nacom paca juntu coyene weiweina exana. Nantiya pana nabarunaxunare David pia weixi, po weixi pewun salmos. Matautano panaxunare po wei pomonae pejume cowuntsiwi pia weixi tatsi xua pewunae jainchi weixi Jesucristo, pon jiwi Pecanamataxeinaein. Panaxunare painya juntu coyene weya po weixi xua Nacom wunae pejainchiwatsi. ²⁰Nacom pon Waxa bapontha pajacobeibare, pajan tsaibinde: “Nacom maisa pajuntu coyene weiweinan xua pocotsiwa daxita pata tana necatsixaemxae. Paca wucatsi Jesucristo pata Tanecanamataxeinaein pabuxuna bobenounan”, pajan tsaibinde.

**Meje yabara po coyene xua pebin piseuribe bewa nabarun
poponaenabe ponbe pejume cowuntsinbe**

²¹Daxita pam bewa bara pacopatsim xua nantiya pana nacanamataxeiname xua painya neexaneibinexa pocotsiwa xua nantiya pana nacui itorobeibame. Bapoxonae xua painya itapeinya xeinaenexa xua painya nebarun itura cui jinaewa pocotsiwa Cristo paca cui itoroba.

²²Yabuxi pam, bewa bara pacopatsim xua painya seuriwi paca canamataxeina xua painya neexaneibiwa pocotsiwa painya seuriwi paca cui itorobeiba. Baraxua paexande icha paichim poxonae

Cristo pon jiwi Pecanamataxeinaein paca cui itoroba. ²³Tsipei pebin canamataxeina piowa, icha Cristo ichi xua canamataxeina piamonae pomonae pia pejume cowuntsiwichixaetsi. Bapon Cristo barapomonae pia Pecapanenebiyaeinchi tatsi. Barapomonae pomonae pejume cowuntsiwi bara be Cristo pia pepon tatsi. Cristo bara be pentasipa pecanamataxeinaexae barapomonae. ²⁴Icha barapomonae ichi pomonae Cristo pejume cowuntsiwichi xua pichichi xua peexanaewa pocotsiwa Cristo itoroba, yabaxi bewa barichi. Bewa exanae daxita pocotsiwa piseuriwi itorobatsi.

²⁵Pebiwi pam paantobeinde painya seuri jiwi, icha Cristo ichi xua antobe daxita xua i dapomonae pomonae pejume cowuntsiwichixaetsi. Cristo pia peantobexae barapomonae tsitupa poxonae naetho tha tupa exanadutatsi poxonae bexotsi. ²⁶Cristo tsitupa barapomonae xua daxita i dapomonae pomonae peyabara jume cowuntsiwixaetsi po coyene xua Cristo juntu coyene xanepana pecana exanaenexa Nacom nexa. Baxua exana xua barapomonae jopa pexeinaewa tsane xua penatsicuentiwa xua abe peexanaexae. Baxua Cristo cana exana poxonae barapomonae tabautisabatsi meratha, xuano xua poxonae paeba xua pinae jume cowunta Nacom Pejume Diwesi. ²⁷Cristo baxua exana daxita pomonaetha pomonae pia pejume cowuntsiwichi xua pecuaranobinexa tsane pia itabaratha, xua yawa pemuxuna cuaranobinexa pia pexeinya peitupanae coicha. Poxonae barapomonae umenaena Cristo peitabaratha jopa yawa umenae tsane peabe coyenewan. Matautano jopa yawa umenae tsane pocotsiwa xua barapomonae abe exanatsi. Barapomonae pejuntu coyene xanepanaewi tsane Nacomtha xua jopa xeinaeyo xua penatsicuentiwa xua abe peexanaexae. ²⁸Pebiwi bewa antobe pia seuriwi, pecui untabexae icha barapo pebiwi ichi xua pia pepon natsiuntabe. Pon pia coutha natsiuntabe bapon piowa antobe xua be caein penaexanaewa tsanebe. ²⁹Dapon ba ajibi pon pia coutha naaitafaetabi. Saya jame naapatsina pexaewa yawano naewatsina beta. Cristo bara juta ichiya cana ichi pomonae Nacom piamonae tatsi daxita xua i dapomonae pomonae Cristo pejume cowuntsiwichixaetsi. ³⁰Cristo beta eena barapomonae tsipei barapomonae be pia pepon tatsi. Waxainchi yaputainchi baxua tsipei barapomonae jiwantsi. Waxainchi pomonaetsi xua caemonae wanaexanae jiwichi Cristo. ³¹Xua pebin yawa piseuri caein naexanabe Nacom Pejume Diwesitha baxua yabara jeye: “Daxota pebin paxa wepu natsata, yawa pena wepu natsata xua piseuribe penaperu cuicuinaenexabe. Bapoxonae baponbe piseuribe be caein naexanabe”, jei Nacom Pejume Diwesitha. ³²Barapo Nacom Pejume Diwesi xua pebin piseuribe yabara baraxua bara be Nacom moya yawun xeina xua po coyene bichocono ainya cui xua jiwi jopa yabara yaputaeyo. Barapo diwesi yabara caunuta xua Cristo iru Nacom piamonae tatsi pomonae

pejume cowuntsiwichi, daxita be caemonae naexana icha pebin piseuribe ichi xua be caeinbe naexanabe. ³³Barichi barapo diwesi paca yabara caunuta. Daxita pebiwi pam bewa paantobem painya seuriwi, icha paichim xua painya coutha pana natsiuntabem. Barichi daxita yabuxi pam painya seuriwi bewa paca yabara baru cui itura jinaena.

6 ¹Pexui pam, paxam pomonae painya nejume cowuntsi jiwi pam Cristo. Painya neantobemxae pon jiwi Pecanamataxeinaein daxota paxam bewa pajume baru jejam pocotsiwa painya axeiwi paca itoroba, tsipei baxua pexeinya cui coyene. ²⁻³Moisés pia peitorobi coyenewa ainya coyenewan xeina. Po peitorobi coyenewa copiya po peitorobi coyene xua ichaxota muxuna xeina xua peyabara tsiwuna muxu dutsiwa, barapo coyenewatha baxua jeye: “Axa cui baru itura jinare, yawa ena cui baru itura jinare, xua painya juntu coyene xanepanaya jinompaenexa, matautano xua painya nejinompaenexa ainya wei dapaein barapo cae pin nacuathe”, jei Moisés pia peitorobi coyenewatha.

⁴Paxam pomonae coxiyei jiwi pam, jopa anaepanaya paitorobeibinde xua daxota painya pexui paca caseba. Jame maisa bewa antobeya pawichitim pocotsi coyeneya Jesucristo, pon jiwi Pecanamataxeinaein, tsita xanepanatsi. Pacuidubare painya pexui xua beta pejinompaenexa. Matautano pamuxuwere xua peexanaenexa pocotsiwa bewa exanae.

⁵Pomonae amanaya painya nepaca cabusi tatayebeibi jiwi pam xua poxonae ichamonae pata nacuitame pajume baru jejande pocotsiwa xua painya nepaca canamataxeinaewi paca itoroba barapo cae pin nacuathe. Barapomonae pabarū cui itura jinare, yawano pacui cunuware barapo painya nepaca canamataxeinaewi xua abe painya nepaca exanaeyainwa. Matautano yatsicaya jume xainyeya pata exande. Barapomonae beta patanacuire icha poxonae paichim poxonae Cristo patanacuitame.

⁶Daunweya patanacuire bequein painya nepaca canamataxeinaewi jopa paca taeyo. Jopa saya daunweya patanacuichinde xua barapomonae painya nepaca taexae. Poxonae baxua paexaname apara saya poxoru painya pia nepaca canamataxeinaewi xanepanaya paca yabara nanta xeinaetsi. Jame maisa patanacuire icha paichim poxonae painya ichichi xua amanaya painya netanacuichiwa painya nepaca canamataxeinaein nexa Cristo. Bichocono daunweya panacuire pocotsiwa xua Nacom tsita xanepanatsi pocotsiwa xua bapon ichichipa. ⁷Poxonae pata nacuitame pomonae painya nepaca canamataxeinaewi weiweinaya panacuire icha be poxonae paichim xua poxonae pata nacuitame pon jiwi Pecanamataxeinaein, pon Cristo Jesús. Jopa bara paichinde xua poxonae jopa xapain patanacuichim pomonae xua poxoru saya jiwixae. ⁸Paxam payaputaneme pocotsiwa xua daxita beta paexaname bara Nacom paca busi cui matomata. Baraxua Nacom pon jiwi Pecanamataxeinaein jupa barapocotsi matoma paca cata, poxonae bequein amanaya painya nepaca

busi cui tatayebeibi jiwi pam xua poxonae ichun pata nacuitame, xuano xua saya poxonae bequein paratixi patsinacuitame.

⁹Paxam pomonae pecanamataxeinae jiwi pam, bewa beta pata exanaem xuya barapo amanaya painya nebusi cui tatayebeibi jiwi. Jopa yabara pamuxuwetsinde xua painya necuainchiwa tsane icha jopa xapain exanaeyo barapomonae. Pananta xeinare xua barapomonae bewa exanae pocotsiwa itoroba pon jiwi Pecanamataxeinaein icha paichim xua iru bewa paexanaename pocotsiwa bapon paca itoroba, pon eca itabocotha. Bapon daxita tsita najupatsi jiwi poxonae yabara paeba peyaputaenexa icha barapomonae natsicuenta xua abe peexanaexae.

**Meje yabara xua pomonae pejume cowuntsiwi Cristo po
coyeneintha bewa amanayabi caurimonaetha**

¹⁰Tamonae pam, anoxuae wetan pocotsiwa xua tapaca tsipaebiwatsi. Ajantusuya pajinompare pon Pecanamataxeinaein jiwi pia peyapusu itorobi coyenewatha tatsi caemonae painya nenaexanaexae bapontha. ¹¹Painya juntu coyene pana naewatsiya yawenare daxita po coyenewantha xua Nacom paca cata xua xota pana nayaawatame painya juntu coyenewa. Bapoxonae paca itacupa xua caurimonae pia pentacaponaein tatsi paamanayabame poxonae paca juntu coyene jujuta xua abe painya neexanaenexa. ¹²Tsipei anoxuae jopa nabetsi xua pepa jiwitha. Jame apara anoxuae penabi coyene exanatsi pomonaetha pomonae peinya pejinompaewi xua caurimonaetha. Barapo caurimonae xeina pia peyapusuwa yawa peitorobi coyene xua jiwi canamataxeinatsi barapo cae pin nacuathe tsique, pomonae abe peexanae jiwi. Matautano jinompa barapo cae pin nacia matatsunthe. ¹³Daxota paxeinare daxita pocotsi juntu coyenein xua Nacom paca cata pocotsi coyeneintha xua pana nayaawatame. Anoxuae pana najuntu coyene wunaere xua painya juntu coyene amanayabi dubenanaebiyaenexa tsane barapo peinya pejinompaewi. Baxua paexande xain awiya bichocono pajuntu coyene daunwam poxonae po mataqueitha paca juntu coyene jujutsina xua abe painya neexanaewa tsane. Bequein paca jujutsina, awiya ajuntucoyenesuya pajinompaename.

¹⁴Pana nacui wunare icha soldadomonae ichi xua yabara nacui wunaeta penabinexa ichamonaetha. Painya juntu coyenewatha paxeinare Nacom pia pexainyei coyenewa painya tsita itapeinya xeinaenexa baraxua xua bara xainyeya pata exaname Nacom. Barapocotsi juta coyeneya paichinde icha be soldadomonae ichi xua poxonae yabara nacui wunaeta penabinexa ichamonaetha bapoxonae naepa cataruba paparuwan xua tsita itapeinya xeina xua bapomonae nacui wunaeta xua bara xainyeya penabinexa xua pon pentacaponaein peitorobixae. Matautano pejuntu coyene xanepanaewa Nacom patsita xeinare painya juntu coyenetha,

painya nenayaewatsinexa icha be poxonae soldadomonae ichi xua xeina po penaintotha xua nantacari acaba poxonae nacui wũanaeta xua penabinexa. ¹⁵Pana najũntũ coyene wũanaere xua painya necueicueijeji tsurubenanaebiyaenexa Nacom pia pexeinya jume diwesi xua po diwesi yabara xua jiwi jũntema pejinompaewa. Barapocotsi jũta coyeneya bara paichinde icha be poxonae soldadomonae ichi, xua poxonae nataxu wũanaetaduba sapaton xua penacui wũanaetsinexa xua naba. ¹⁶Mataũtano pamuxuna xeinare xua bichocono painya nejume cowũntsiwa Nacom, xua pana najũntũ coyene yawenname poxonae caurimonae pia pentacaponaein tatsi paca jũntũ coyene jũjũta. Barapocotsi jũta coyeneya bara paichinde icha be soldadomonae ichi xua pemaxũntha duba peperacae nain xua naita arababa. Poxonae pia peaitafaetabi jiwi cawababatsi pocotsiwantha xua peopi sojeiwantha xua iso itere xeina, bapoxonae barapo peperacae naintontha naita arababa barapomonae, yawano baxota itaxubaba iso itere. ¹⁷Pacopare xua bara Nacom paca capanenebiyaena painya paca jũntũ coyene araranaenexa caurimonae pecuiyainwa. Barapocotsi jũta coyeneya bara paichinde icha be soldadomonae ichi xua penain yoreitha nanta acaba. Nacom Pejume Diwesi painya jũntũ coyenetha paxeinare xua po jume Nacom pia Pejumope tũnaxũ tatsi paca cata xua po jumetha painya nenayaewatsinexa painya nepaca caaitafaetabi jiwi pecuiyainwa. Barapocotsi jũta coyeneya bara paichinde icha be soldadomonae ichi xua capona cusi penayaewatsinexa pia peaitafaetabi jiwichi pecuiyainwa. ¹⁸Nacomtha matowa patsipaebeibare daxita matakabintha be pocotsi coyeneya paca yawena Nacom pia Pejumope tũnaxũ tatsi. Nacomtha pawũqueibare daxita painya newũcae coyenewatha tsaibi pocotsiwan xua panantawenoname. Xain daxita matakabintha tsaibi tsaca painompeibame, mataũta bapana jopa paajũntũcoyenefaetabinde xua pawũcame Nacom. Bichocono matowa patawũcare daxita pomonae Nacom piamonae tatsi. ¹⁹Barichi painta wũcare Nacomtha xua bapon tanecatsinexa po jume diwesitha xua tacueicueijeinexa. Mataũtano painta wũcare xua tana neitacũpaewa xua cui tsacatsacapiya tacueicueijeinexa, xua jiwi yabara yaputane taexanaenexa pocotsiwa xua Nacom moya yawũn xeina po coyene yabara xua Nacom capanepa exana pomonae jopa judiomonae naexanaeyo. ²⁰Nacom neitoroba icha nacuantha xua tacueicueijeinexa Nacom Pejume Diwesi bapon nexa. Daxota anoxuae ichamonae neeta jiwi pecũbi botha tacueicueijeixae Nacom nexa. Painta Nacomtha wũcare xua cui tsacatsacapiya tacueicueijeinexa tsane poxonae icha bewa cueicueijan tsane.

Meje yabara poxonae Pablo najume wetsiya paeba barapo cartathe

²¹Tĩquico pon paxan paantobein, pon irũ pejume cowũntsin Jesucristo bapon pacata itorobatsi. Bapon Tĩquico bara xainyeya

exana poxonae pana neyawena Nacom pia petanacuichiwa tatsi pon jiwi Pecanamataxeinaein. Bapon daxita paca tsipaebina xua neyabara paebina, yawano pocotsiwa xua exanan baxua yabara paca tsipaebina. ²²Bapon Tíquico pacata itorobatsi yaitama ichichipan xua bapon yabara paca tsipaebina xua pata jinompaewa. Bapoxonae bapon paca jũntũ coyene tsacabina, jũntũ coyene weiweinaya sadũjei painya nejinompaewa tsane xua bara beta tapoponaexae.

²³Barabũ Nacom, pon Waxa, irũrũ Jesucristo, pon jiwi Pecanamataxeinaein, baponbe jũntema jinompa cana exanaenabe pomonaetha daxita pomonae pia pejume cowũntsiwixaetsi. Mataũtano barabũ exanaenabe xua barapomonae nantiya naantobe tsane. Mataũtano barabũ exanaenabe xua barapomonae ajũntũcoyenesũya jume cowũnta dubenanaebiyaena. ²⁴Mataũtano barabũ Nacom peantobexae yawenaena daxita pomonaetha pomonae peantobewi Jesucristo pon Wanacanamataxeinaein. Bapoxonae barapomonae pexeinaenexa tsane po coyene antobe ichamonaetha po coyenewa xua ataya tsiteca.

Baja Pablo.